

**The 15<sup>th</sup>**  
**MISSION & EVANGELISM KHAWMPI**  
**SEMINAR PAPER**

**Thupi: Gingtute Himakmaw Missionary Nasep**  
**Date: 11/03/2017      Amun: Tangmual P.C.**

**Rev. Siama Phaltual**

*Kei ka hileh chu mitam tak in hinna a nei ua, tamtak a nei theina ding ua hung ka hi. Johan 10:10.*

**Thumapui:**

Gingtu khat hina jiaka Pathian I biak ua adawidan ah nisin hinkhua i matnau ua lung awi mai dinga ngai-tuana liantak nei, missionary nasepna hi Pathian in a kochuamte kiana mawpuakna a piak hi muchianlo tamtak i um ding uh ka ging cha ahi. Kochuam tamtak in missionary nasepna hi ngaisakna neitheo nailo, ahilo leh missionary vision neuchakhat nei pan pan bang a ki um hi. Gingtute himaw um maithei i hipuau. A ziak chu, Lapa I Pathian uh hi missionary Pathian ahia, missionary Pathian ahijiak in ei uh le mangthai ah i umlai un a chapa Jesu Khrista ah ei hung hawldaw ahi. Ziakiachun, gingtute a ding inle missionary nasep hi hilo theilo (Himakmaw) nasep ding i nei uh chu ahi. Tuni hin gingtute a dinga Missionary nasep hi himakmaw ahin dan, missionary nasepna lam ah a hatlona jiak uh leh pan thak lak ding dan tamlo cha zikhawm ding in ka hung kisingsa ahi.

**HIMAKMAW AHIDAN:**

Khenkhatten missionary nasep hi gamdang ah kuandaw chau chu ngai thupi ah kawi, zia tilo chu missionary nasepna ngai theilo bang a ki um ahi. Jesu Khrista'n missionary nasepna ding ah mun ei kawkmuchu 'Khawvel hi ahi' (Mtt. 13:38). Pathian in khawvel hi hukdam a nuam ahi (Jn3:16), Jesu Khrista kha mizosia a ding in a hung thi ahi (Jn1;29). Zia hukdamna chanchinpha chu puangjak dingin Khrista mawpuakna a nungjuite kiang in a pia ahi (Jn 20:21). Tuni gingtute ngei hile Jesu Khrista nungjuite i hui a, zia mawpuakna hi i chungun a ki-nga ahi. Ziakiachun, chanchinpha puangjak ding hi gingtute'n a bawlo theilo uh nasep ding i nei uh chu ahi. Nang in zia mawpuakna hi bangtiang la sem tam le? Mawpuakna i nei uh hi i mit ngei ua a muchian a pawimaw ahi.

**Tulai kochuamte I hatlona ziak uh:**

Kochuamtin in hatlona chuam chuam neichiat ding i hui a, a tangpi a tulai kochuamte hatlona jiak khenkhat vak en suk hitiu.

1. Khrista'n ' *Khawvel zosia'n chiau inla.....chanchinpa va gen un*', (Mk 16:15). ti thu hi i ngaisaklo ziak uh ahi.

*Zia gual ah gingtute kiana Pathian in mawpuakna ei piakte hi tulai kochuamte'n i muchian leh hechian lo a i um tau ahi.*

2. Kochuamte hin missionary a dinga pauchapna, thilpiak leh missionary dinga kipiakdawna hi i taksap ziak uh ahi.

*Muchianlo leh hechianlo kochuam chun missionary a ding a pauchap ding, thilpiak piak ding leh keima ngei kuan ingka tia ngaidan nei ding chu thil hitheilo ahi.*

3. Kochuam leh inkuan tin in taksa lam khantona ( building leh thil zat chuamchuamte) bep i ngai pawimaw ziak uh ahi.

4. Kochuam in sum leh pai i tuak tam peilo ziak.

*Pathian pia kingaitualo ah midangte pia i kingaitua jiak un thawlawm piak hile i chau pha sek ui.*

5. Kochuam puitu lamte'n missionary nasep hi a pawimaw zia i tangkopi tawm ziak ahi.

6. Kochuamte hin member tam ding bep i buaipiu a, thagau lam ah khangto ding i hiatmil ziak uh ahi.

7. Missionary box nei thei nailo i tam ziak.

8. Kochuamte'n kei panglo leng le bangma buaina ding a um puai ti ngaidan i nei tam jiak uh ahi

*Ki ngai pawimawna neilo.*

9. Kochuamte'n Pathian i nei zawlo jiak uh ahi.

*Pathian neite chun gasua kilawm tak mai a nei jing sek ui. Jesu Khrista ah hinna i nei kha midangte piak sawnna lungthim i nei theilo chun ngaitua kham a ting ahi.*

Kochuamte'n missionary nasepna lam ah malam i sawt zel theina dingna ding a nuai ah thu tamlo cha hi vak ngaitua khawm hitiu.

### **1. Khut ah sep angai ahi.**

Missionary na hi sem nuam chiat maleu hin a field ngei in i chia chiat thei pua, himaleh septheina lampi hawi tak i nei uh ahi. Field mun ah umlo ziaka missionary i hilo diaklo ahi. Zia na ding ah chun khut nasep in i pangthei ahi. Missionaryte a ding a thawlawm hawitaka la piak chun nangma ngei kha missionary la hi mai a, field ah kochuamte leh field ah matchak ding nik leh puan, sil leh chen missionaryte a dinga blanket, um leh bel leh thidang tampi la pethei ahi. A pawimawte kiphala taka la piak khan na lopi tak a sem ahi ti hiat ding ahi. La khut in missionary na lopi leh tamtak la semthei ahi.

Insuantin in thasin in missionary chawpna'n Rs. 100/- chiat bang tuak zo taleu hin a bul hi pan hawi thei bep ding ihu. Ahijiakin ei kochuamte hin thilpiak lam ahin kiphalna i nei tawm mamau a bang ahi. Etsakna'n missionary nasepna dinga Box insuantin ah i kawite bang hi thawlawm dinga sum leh pai kawi malaka a box tunna le hephal talo ki umthei ahi

### **2. Pauchap ding.**

Pauchapna hi gingtute a dinga thilhi theina khat ahi. Pathian kiangah i pawimawte i tutna leh Pathian a pata a malsawmna hung kipat ahi. Kochuamte'n le missionaryte a ding leh a sepna ah kochuamte leh ginglote ading in pauchap piak jing leu hin missionaryte'n Lalpa panpina dawn be ngei ding ahiu. Missionaryte hin ginglote kiangin chanchinpha mimal mal ah, inkuan ah leh biakin ah gen jing ahiu in, Lalpa'n mite lungthim a hawn piak jingna dinga i pauchap piak jing ding ahi.

Chun, Pathian jalin Missionary fieldte ahin Schiool ministry bang lalpa'n ei piak be ta, School ministry a pat ahin chanchinpha gen kigua ahi. naupangte'n pauchap dante. bible changte leh Khristian chawndante a hung jilna ding mun uh ahi. Ziakachun, Evangelist. teacherte a ding leh naupangte adinga i pauchap piak a pwimaw ahi.

### **3. Kochuam puite'n mawpuakna liantak a nei hi.**

Kochuam sung ah missionary nasep lam a taksap ziaq lian tak khat chu kochuam puitute'n kochuam member missionary nasepna lam ahin tilkhona leh hetthiam sakna i taksap jiaq uh ahi. Aziak chu kochuamte'n missionary nasepna lam hi hethiamlo in kochuam puitute ading a ngaituana neizing in missionary nasep ding hi amau a gual ah gel thei nailo tamtak a ki um ahi.

Kochuam member khen inla piakdaw sanga laklutna lam ding bep ngaituana jiaka missionary nasepna lam jiang ale lunglutlo, chuleh Kochuam ah thawlawm piak sanga a mau ading bep ngaituana nei bang a ki-um kit ahi. Pathian thu lam ngaituana neilo ah dawngcha vak gel jiang a chun thil hithei tak khat chu ahi. Ahinla, missionary nasep ding hi gingtute ading ah Khrista'n mawpuakna ei piakte ihu a, jiaka chun maw um maithei ihi puau hi. Ziakachun, kochuamte'n hawitak leh phata a missionary nasepna lam hi a hetthiam theina ding un kochuam puitute'n mawpuakna liantak i nei uh ahi. Kochuam ah missionary thawlawm a piak danteu, a lunglutnau haw hawi tak a kanchian jel a pawimaw hi. Kochuamte'n missionary nasepna lama lunglutna a nei tawm uh chun kochuam puite'n hattaka tilkho ah hethiamsak guat jing ding ahi. Kochuam puitute'n lunglutna i neizawlo ahi chun kochuam sunga missionary nasepna lam vang a hatlo ding him ahi.

### **Thukhakna:**

Kochuamte hi chanchinpha gen jeldinga Khrista'n mawpuakna ei piakte ihu a; chanchinpha puangjak jel dinga sawl ah umte chu ihu ahi. Khuga Sadar Presbytery huapsunga kochuamte ngei hin le zia na lopi tak mai chu sem jelin sum leh pai tha leh jung tamtak seng in missionary nasepna lam ahin ma ila jel ui. kochuamte'm Jesu Khrista ngansiana theidan dan ah a seplai un nang missionary nasepna lam ahin bang gual in la pang em le?